



# Sekolo sa Moriting phoraemari se tšea leeto

Sepedi

Notozi Mgobozi



# **Sekolo sa Moriting phoraemari se tšea leeto**

Mongwadi ke Notozi Mgobozi  
Moswantšhi ke Dale Blankenaar



Phetolelo ya puku go Sepedi e dirilwe ke Maureen Ramusi

Barutwana ba sekolo sa Moriting motsaneng wa Tembisa ba itokišetša leeto la go ya Kapa. Pele ga maikhutšo a dikolo a selemo, ba kgopetšwe gore ba itokišetše leeto, eupša hlogo ya sekolo a se ba botše lefelo leo ba yago go lona. O ile a ba tsebiša gore ke barutwana ba Kreiti ya 3 feela bao ba tla tšeago leeto leo. Tsebišo ye e ile ya kweša barutwana ba bangwe bohloko.





Barutwana ba bangwe ba be ba nyamile e bile ba fedile maatla, ka ge hlogo ya sekolo a boletše gore ba sa le ba bannyane gore ba ka tšea maeto le gore ba tla hwetša sebaka sa bona ngwageng wo o latelago. Ge sekolo se tswalelela maikhutšo a mafelelo a kotara, barutwana ba Kreiti ya 3 ba thoma go bala matšatši a a šetšego a maikhutšo a kotara ye e tlogo, ge ba tla be ba tlo tšea leeto.

Barutwana ba Kreiti ya 3 ba be ba thabile ge ba lebile nakong ye, ba bangwe ba bona ba sa kgone le go theeletša ge go rutwa ka phapošing, ka lebaka la lethabo.



Hlogo ya sekolo ga se a ba botšha gore ba tla fofela Kapa gomme sefofane se tla namelwa go la OR Tambo. Semaka se se tla ba kgaolela ditshenyagalelo ba kgona go reka mefago ge ba be ba ka sepela ka pese. Yo mongwe le yo mongwe wa bona a thoma go kgantšha tšeo a di reketšwego ke batswadi ba gagwe go itokišetša leeto.





Barutwana ba boditšwe feela ka Mošupologo pele ga go tšea leeto gore ba se lokiše mefago ya tsela. Ka letšatši la go sepela, bohle ba be ba thabetše go bona dikolointefe tše pedi di ba emetše ka jarateng ya sekolo e sa le mosong. Ba be ba farafarilwe ke batswadi ba bona ba swere dikobo ka ge go be go tonya.





Ba bangwe ba be ba swere dikobo tše boima le ge batswadi ba bona ba tsebile gore ba be ba sa swanela go dira bjalo, ba be ba dumeletšwe feela go tšea mokotlana goba sutukheise ya diaparo tša bona.

Ba ile ba namela dikolointefe ka jarateng ya sekolo gomme ba leba boemafofaneng bja OR Tambo.

Ka moka ba be ba tšhogile gobane go be go se na le yo a tsebago gore ba ya go fofela Kapa.

Ba bangwe ba bona ba thoma go lla ka lebaka la gore ba be ba tšhogile sefofane le go fofa godimo moyeng.





Barutiši ba thoma go šomana le go homotša bana bao ba bego ba lla ba tšhogile go namela sefofane. Hlogo ya sekolo a ba omanyana a ba tšhošetša gore ba tla swarwa ke maphodisa.

Ba emiša ka go lla gomme ba tsena ka lefelong la boemafofane, ba lebeletše gohle ba makadišwe ke go bona dilo tšeo ba bego ba di bona la mathomo. Ba bangwe ba be ba sega ka lethabo.





Ge sefofane se tsokama, barutwana ba sepela  
ka mothalo go namela sefofane.

Ba bangwe ba be ba šetše ba dutše ka  
sefofaneng, gomme bašomedi ba ka sefofaneng  
ba ba bofa ka mapanta gore ba bolokege.

Ba bangwe ba be ba šetše ba dutše ba  
lebeletše ka makalo, ba bonagala ba sa thaba  
ebile ba tšhogile.

Ge nako ya go tloga ya sefofane e fihla,  
mošomedi wa ka sefofaneng a ema pele a  
bontšha melao ya ka sefofaneng.

Thato wa mengwaga ye senyane (9) o be a swere khamera a tšea diswantšho. Mošomedi wa ka sefofaneng a mmotšha gore a dule fase a bofe lepanta ka ge nako e be e se sa mo dumelela go tšea diswantšho. Thato a dula fase a swabile ka khamera yeo e bego e lekeletše molaleng wa gagwe. Ge sefofane se tloga fase, barutwana ba bangwe ba thoma go lla ka letšhogo. Ba ile ba homotšwa ke bašomedi ba ka sefofaneng le banamedi bao ba bego ba dutše kgauswi le bona.



Mošemane yo mongwe yo a bego a dutše kgauswi ga lefasetere o be a goeletša a šupa ka ntle ga lefasetere a re, “re fofa ka godimo ga lewatle, re tlo nwelela.” Ka moka ba be ba homotše ba lebeletše ka ntle ga lefasetere. Nako yeo ka moka, Leago o be a khutišitše phaketana yeo e bego e tletše dijo. A dumediša ba bangwe le go ba laletša dijong. A re, “etlang re jeng, ke swerwe ke tlala.”





O ile a kgopelwa gore a dule fase a tswalele phakete yela ya go ba le dijo tša gagwe gobane ba be ba tlo ba fa diseneke. Barutwana ba bangwe ba be ba sega ge morutiši wa gagwe a mo omanya. Leago o be a ipoditše gore o tlo ipshina ka dijo tša gagwe ge a fihla Kapa. Ba ile ba fiwa diseneke gomme ba ja ka lethabo.



Sefofane se ile sa tsokama boemafofaneng bja Kapa. Barutwana ba bangwe ba be ba thabile, ba eme ba lebeletše ka mafesetere. Ba bangwe ba be ba sa tšhogile ba swerwe ka matsogo ke banamedi ba bangwe go ba thuša dieskaleiteng. Ba fologa ba tšea merwalo ya bona lefanteng la merwalo, ba goeletša ka lethabo. Pese e be e ba emetše lefelong la go phaka.



Barutwana ba be ba maketše ebile ba thabile ba lwela le madulo ka peseng, ge bohle ba nyaka go hwetša madulo a lefasetereng gore ba kgone go bogela Kapa. Ba fihlile hoteleng ya Blue Moon ya go lebana le lewatle la Sea Point. Ba fologile pese, ba tšea merwalo ya bona. Ba bangwe ba be ba šetše ba apola diaparo tša bona ba nyaka go yo rutha. Thato a goeletša a re, “a nke le se kitime hle bagwera, le ke lewatle e se go noka.”





“Ba emiše morutiši,” a realo Thato. “Ye ga se noka, le tla nwelela.” Ba ile ba hlahlwa go ya diphapošing tša bona ke bašomi ba hotele moo ba bego ba dula ka bobedi ka bobedi. Ba be ba thabile gape ge ba lebelela fenitšhara ya ka phapošing le diphasela tša bona tša go ba amogela. Ka morago ga nakwana, ba ile ba biletšwa phapošing ya bojelo go yo ja dilalelo.



Ba ile ba kitimela ditulong tše di kaone tafoleng ya dilalelo. Ba be ba se na le bonnete bja gore ba ya go kgetha eng ka lebaka la gore dijo tše di bego di solwa ba be ba sa di tsebe. Bašomedi ba hotele ba ba thuša ka dikgetho tša bona le go ba sodiša dijo ka diporotong tša bona. Ka morago ga ge ba bile mafelong ao ba bego ba beakantše go a etela, ba ile ba itokišetša go boela gae.





Barutwana le barutiši bao ba bego ba apere diterekesutu ba ile ba namela pese go ba iša boemafofane. Ba ile ba namela sefofane ntle le kgatelelo ye kgolo ka menaganong ba fofela morago go la OR Tambo.

Ba fologa sefofane ba namela dikolointefe go boela gae, ba tletše ka lethabo, ba fela pelo go fihla gae go abelana ka maitemogelo a bona. Bohle kua sekolong ba be ba thabile ge ba ba amogela.

Barutwana ba dikreiti tše dingwe ba be ba fela pelo ya sebaka sa bona sa go tšea maeto mengwageng ye e latelago.





# DITEBOGO

## **E ngwadilwe ke**

Notozi Mgobozi

## **Moswantšhi ke**

Dale Blankenaar

## **Molekodi ke**

Ntombi Kayise Njadayi

Nelisa Mviko

Nopasika Xapa

## **Mohlami ke**

PixelPing Design

## **Mofetoši wa puke ke**

Maureen Ramusi

## **Motsinkedi wa puku ke**

Makoma Phatudi



ISBN 978-0-638-00757-2



basic education  
Department:  
Basic Education  
REPUBLIC OF SOUTH AFRICA

